


76 80
L'AMENDE
HONORABLE
DE
IVLES MAZARIN.
DES CRIMES QV'IL A
commis contre Dieu, contre le
Roy, & contre luy-mesme.



A PARIS,

M. DC. XLIX.



L'AMENDE HONORABLE
de Iules Mazarin, des crimes qu'il a commis
contre Dieu, contre le Roy, & contre
luy-mesme.



'EN est fait, mes execrables crimes m'ont enfin rendu la Terre & le Ciel ennemis, & si la vengeance des hommes tourmente incessamment mon corps, la haine de Dieu & son inimitié irreconciliable affligent encore bien davantage mon esprit. Tout est en desordre & en confusion chez moy, & ie n'ay pas en mon ame vne seule partie qui soit saine, tout est pourry & cicatricé. Que mes apprehensions m'espouuentent! les fureurs me bourellent à toute heure, & le bruit du tonnerre qui gronde contre moy de tous costez, me fait craindre que bien tost mon corps ne soit liuré aux corbeaux, & aux loups, afin de seruir d'un exemple memorable à la posterité.

I'entends sans cesse à mes oreilles mille plaintes publiques, on m'appelle par tout le Tyran de la France. Ceux-mesmes qui adorēt le vice, me nomment avec horreur le meurtrier d'innocens, le deserteur des Estats, le faux Polytique, qui mets tout en vsage pour m'agrandir à la ruine des peuples. Les moins accoustumez à mesdire, publient rai-

sonnablement que ie suis le fleau des orphelins, l'oppression de tous les Suiets du Royaume, & qu'avec beaucoup d'audace & d'artifice ie me suis enrichy des thresors de la France: Qu'homme du monde ne fut iamais plus criminel en toutes sortes que ie le suis, que pour me faire commander avec tyrannie, l'enfer mesme m'a donné des leçons, & m'ayant fait rair le pouuoir de mon Prince, m'a enfin rendu impunément le possesseur des biens & de la liberté de tous ses Suiets.

Voilà, voilà, François, les vrais discours des peuples que i'ay soumis à mes violéces, & à mes cruautés, ils n'ont plus maintenant la durezza des pierres, ny l'insensibilité des arbres; & ce n'est pas me calomnier que de me dire tant d'iniures, puis que i'aduouë que mes crimes sont encore plus grands que leurs reproches. Mais à quoy bon confesser cette verité, si ie n'ay point d'enuie de m'en repentir?

Il est iuste neantmoins que si Dieu ne me donne des graces pour me conuertir, en estant indigne, qu'en tous cas, ie des-abuse beaucoup de monde, qui m'ont peut-estre creu dans les nations estrangeres, aussi bon & vertueux Cardinal, que ie suis meschant & abominable. Pour descouurir donc mes tromperies & mes inuentions diaboliques, ie dis en public mes crimes, ie les confesse, & i'en fais vne amende honorable à vous, mon Dieu, & tout nud en chemise, ayant la corde au col, & la torche à la main: Voicy de quelle sorte

ie

REC/NU

ie m'en accuse, & i'en dis ma faute, & ma tres-griefue faute.

Il ne faut pas, sur peine de peché mortel, que personne viuante m'excuse, puis que ie suis non seulement coupable des pechez cy-dessus declarez, mais encore de tous ceux qui suiuent, & que ie vay déduire.

I'ay trahy le Roy d'Espagne, dont ie suis Sujet, & ma Patrie consequemment; puis pour mettre à couuert mon crime, & ma vie, ie me suis refugié en France, encore que depuis la mort de LOUIS XIII. d'heureuse memoire, les Princes, les grands Seigneurs, & les Officiers de France eussent protesté de ne plus souffrir qu'aucun particulier s'eleuât sur les espaules du Roy, comme auoit fait le Cardinal de Richelieu, à l'oppression de tout le monde, sous ce nouueau nom de Ministre d'Estat. Neantmoins ie n'ay pas laissé de m'estre installé dans ce nouueau ministere: Ce n'est pas par ma naissance, ny par aucun notable seruice que i'aye rendu à l'Estat, ny par mon merite que ie suis paruenue à cette haute dignité, puis qu'on sçait bien que ie suis Italien d'origine, & de tres-basse extraction, ayant esté valet en diuers endroits à Rome, où i'ay seruy dans les plus abominables debauches de ce pays-là. Mon artificieux esprit pleût au defunct Cardinal, où ie me pouffay auprès de luy, par mes fourbes & plaisanteries, qui firent qu'il m'auança pour luy seruir d'espion, & de ministere à ses intrigues particulieres. Apres la mort

de cette Eminence, le Roy me donna son autorité; & depuis ce temps là, l'on n'a point connu d'autre puissance à la Cour, & dans les affaires du dedans & du dehors que la mienne, au grand scandale de la Maison Royale, mesme de toute la France, & à la risée de toutes les nations estrangeres. Lors que ie me fus long-temps repeu du sang des pauvres Sujets du Royaume, ie bannis, & ie fis emprisonner sans suiet ny sans aucune forme de Iustice, les Princes, les Officiers de France, ceux du Parlement de Paris, & les plus fideles Seruiteurs du Roy. I'ay fait mourir le President Barillon par poison, faisant passer pour crime la trop grande affection qu'il auoit pour le seruice de sa Maiesté & le bien de l'Estat. I'ay mis dedans les fers vingt-cinq mille prisonniers pour les Tailles, & de ce grand nombre il en est mort six mille de faim dans les prisons, depuis six ans que ie regis l'Empire. I'ay fait beaucoup plus de maux, que si les ennemis eussent entrez vainqueurs & à main armée dans l'Estat. Enfin pour faire reussir mes meschantes entreprises, ie ne me suis seruy que de traistres, que de voleurs, & que d'athées; & il est vray que ie n'ay pris la conduite du Roy, que pour le maistriser, & le gouverner à ma mode. I'ay de telle sorte agy à la Cour, que les Vertus ont esté surmontées par les vices. I'ay inuenté les jeux & les berlans. I'ay vaincu la pudeur des Dames par des charmes magiques, & il s'est fait plus de rapt pendant mon ministere, & depuis que ie gouverne l'Estat, que

le Royaume n'en auoit veu depuis plus de cent ans.

Pour auoir moyen de voler impunément les Finances, ie fis rehausser les Tailles & les Aydes, & les fis leuer par des compagnies de Fuzeliers, que l'on peut dire autant de demons. Helas! que i'ay tiré d'emolumens des os & des moüelles du peuple qui gemit il ya si long-temps sous le joug de ma cruelle seruitude. l'ay ruiné, & renuersé toute la iustice, empeschant qu'on ne la rendist à mes associez les Partisans. l'ay, pour tout dire, pillé tout l'argent de la France, reduisant sa Maiesté à vne extreme indigence, & en suite tous ses Sujets à vne mendicité déplorable, & pire que la mort. l'ay fait mourir de faim & de necessité toutes les Armées, qui n'ont touché depuis cinq ans qu'une ou deux monstres par an; & i'aduoue que c'est ce qui a fait perir plus de six vingts mille soldats, qui sont motts plus par la misere que par le fer des ennemis. Je ne puis pas dénier d'auoir fait transporter à Venise, & en autres lieux d'Italie. plusieurs millions, soit par lettres de change, soit en especes ou en pierreries, sous pretexte de leuer vne armée nauale, pour aller conquerir Piombino & Portolongone. De quelles damnables maximes ne me suis ie point seruy pour dissiper nos Armées quand elles ont esté victorieuses, & sur le point de faire de notables progres? Ne le peut on pas remarquer deux fois en Catalogne, au siege de Lerida, à la surprise de Courtray, & aux affaires de Naples

que i'ay laissé déperir à dessein de ruiner Monsieur le Duc de Guyse?

Tant y a que i'ay fait des meschancetez si horribles, que cét Auguste Senat de Paris, ayant horreur de mes cruautez, a pris le parti des peuples ruinez, & d'un coup de foudre a mis mes desseins en poussiere. I'ay beau à me vouloir garantir par l'armée, dont i'ay enuie d'affamer Paris; cela est inutile, & ie connois bien que les armes ne peuvent pas dissiper mes craintes, puis qu'il est vray que ie ne suis plus qu'un objet d'horreur, d'impiété, & de brigandage. Ie commence d'en auoir contrition: Mon Dieu, ayez pitié de moy, & faites que vostre iustice cede à vostre misericorde. I'apperçoy, mon Iesus, que la discorde anime les Demons contre moy pour me liurer au Diable, & qu'ayant fait encore plus de forfait que ie n'aduouë, ie suis indigne du Paradis: Toutesfois, mon Sauueur, puis que vos bontez surpassent tous mes delits, ie vous conjure par vos graces sublimes de me pardonner, & de ne permettre pas qu'un meschant homme de Cardinal que ie suis, aille du Louure loger dans l'enfer. Mon ame est de trop grand prix, placez-la dans le Ciel, s'il vous plaist; pour mon corps, ie le liure à la rigueur de la iustice humaine, sçachant bien que les vrais François ne souhaitent que ma mort, pour assouuir leur haine, & leur vengeance.

F I N.